

Proyecto tocante guia intensivo na casnan di famia entrega na Minister Dowers



ORANJESTAD - Siman pasa representantenan di Fundacion Guia Mi a presenta un “projectdossier” encuanto guia intensivo na cas na Minister di Husticia y Enseñansa, mr. drs. Arthur Dowers. E proyecto aki ta encera cu Fundacion Guia Mi lo provee

guia na casnan di famianan unda cu tin reto, pero cu a wordo constata cu si tin guia mas intensivo e retonan aki lo por wordo resolvi y no ta necesario, por ehempel, pa busca un cas y cuido alternativo pa e miembronan di famia menor di edad.

E ayudo inicialmente lo ta di 12 ora pa siman, pa seis luna, cu e posibilidad pa extende e periodo di ayudo cu tres luna mas. Un profesional den guia di famia lo bishita e cas cuater dia pa siman pa 2.5 ora cada biaha. Durante e sesionnan aki e famia lo haya guia den con pa cambia cierto comportacion cu lo yuda e personanan envolvi funciona miho como

un unidad familiar. E enfasis ta wordo poni ariba acercamento positivo di parti di e fundacion.

Cu e proyecto aki Fundacion Guia Mi kier brinda ayudo na menornan di e edad, esta personanan di 0 pa 18 aña y nan mayornan.

E guia intensivo na cas no ta solamente mas barata cu si e menor mester wordo saca di e famia pa bay biba por ehempel na Imeldahof y Orthopedagogisch Centrum, pero e ta yuda alivia e presion ariba e instancianan aki tambe – unda tin listanan di espera bastante largo, tanten cu henter e famia ta beneficia di e guia ofreci. □